



Tite Sacoman di Gnespolêt al veve la cuarte elementâr. Famee di contadinuts, a rustîsi di un soreli al altri pe campagne a pro de puare bocjade.

Fantat, al domande di jentrâ cui carabinieri e si presente, di vincj agns, a Moncalieri pe visite di jeve.

Cjase, il dì prime, al veve folât cui pîts intal brantiel la vignute dal bacò, un vin neri e penç come l'ingjustri, e ducj ridi tal doman a Moncalieri, crot, ae visite di jeve, tal viodilu di doi colôrs e neri dapît in sù fin al balonat.

Ma lu àn fat bon distès. Tant bon di mandâlu a Rome, carabinieri a cjavai e fintremai adet ai cjavai di Starace, segretari nazionâl dal Fassio, biel e dut tirât parsore di cjavai di gale, a cori e saltâ daûr Starace.

Un timp in glorie, svolât vie tun amen, cul vot di setembar dal cuarantetrê quant che, te caserme dai carabinieri a Rome, a jentrin i todescs sui cjars armâts e Tite al va a patî fam e netâ maseriis in Gjermanie.

Tornât dopo la guere a fâ il carabinieri, Tite si impense come tun sium dai siei cjavai, ma la zoventût e il timp di Starace i son scjampâts par simpri vie di man, al comence a pensâ cjase

e, subit che lu lassin lâ, al va in pension.

Voltade pagjine, e tache alore cumò la liende di Tite Sacoman cul mus. Pe precision, dôs mussis, che lu judin a lavorâ i siei cjamputs.

Ma di cjaval a mus nol è tant pete che dai. Un mus al à il sens de mansuetudin, de pazience, de laboriositât, ma no de sotanance. Al ubidis se al dîs lui di ubidî. Lis cjape, ma nol mole se no je reson. Al cognòs e al à rivuart pal so paron, ma no sudizion.

“Ho detto vaaa!” Tite ur businave aes mussis par talian, tornât di carabinieri, e lôr magari invezit a morestavin subit il pas o fintremai fermâsi, daûr il lôr pensâ.

Pe campagne, la int lu sintive eresiâ a distance, saldo par talian, cu lis mussis o magari cu la femine, che e veve cjapât ancje Marie ben e no mâl dal mus.

Lis mussis si molavin ogni volte a dute corse, tornant cjase la sere de campagne, man a man che si faseve dongje la stalute tal curtîl dal Blanc, dulà poiâ la strache e gjoldi une grampe di foragjo. Ma si tratave di imbocjâ a misure il volt dal lôr puarton, di no lâ a sbati.

“Staaa!” ur businave Tite orcolant sul cjar. Fin che, une sere, pe primure, il cjar si è incjastrât a mieç puarton. Tite alore al salte jù come un danât, crustantsi lis conolis pal gnervôs, al cjape une musse par une orele a plere e i busine dentri “Ho detto staaa!” Intant lôr dôs, cidinis, spietâ cun sante pazience che si cuieti e i passi la fumate.

**di Ivano Urli**

**#976**